



Komunikadu Imprensa
09 Agostu 2024

Tribunál tama fériadu judisiál
Prokuradór no ofisiál justisa sira tribunál utiliza tempu feriadu tuir formasaun

Kada tinan hahú hosi 01 Agostu to'o 15 Setembru 2024, Tribunál sira tama ba loron fériadu judisiál no sei tama fali serbisu hanesan bain-bain iha 16 Setembru 2024. Durante períodu ne'e, Tribunál Judisiál Primeira Instánsia Dili, Baukau, Suai no Oekusi sei suspende atividade prosesu julgamentu hanesan bain-bain maibé kontinua atende kazu urjente sira liuhosi turnu ba prosesu sumáriu, arguidu detidu, prezu no primeiru interrogatóriu inklui kazu sivíl providénsia kautelár.

Tempu feriadu iha tinan ida ne'e, oportunidade formasaun ba de'it iha ofisiál justisa sira tribunál nian no prokuradór sira hosi Ministériu Públiku. Formasaun ba ofisiál justisa sira sei fahe ba grupu rua no matéria mak kona-ba Violénsia Bazeia ba Jéneru (VBJ) no alterasaun Kódigu Prosesu Penál. Formasaun ne'e fasilita hosi UNDP. Entretantu formasaun ba prokuradór sira, foka liu ba iha krime sira previstu iha Lei Nú. 7/2020 kona-ba Medida sira Prevensaun no Kombate Korrupsaun espesífiku ba iha asuntu deklarasaun rendimentu, rikusoin no korrupsaun. Alende ne'e, prokuradór mós hetan formasaun kona-ba Kódigu Penál espesífiku krime iha funsaun pública nia ezersísio ne'ebé iha ligasaun ho krime sira ho natureza korrupsaun.

"JSMP konsidera hasa'e kapasidade autór tribunál sira importante tebes nune'e JSMP apresia política Governu liuhosi Sentru Formasaun Jurídika no Judisiária ne'ebé kontinua organiza no fasilita formasaun ba iha autór tribunál sira iha tempu feriadu judisiál. Espera ho formasaun sira ne'e bele aumenta kapasidade no sensibilidade autór tribunál sira nian iha atendimentu kazu sira espesífiku ba iha kazu VBJ no kazu sira ho natureza korrupsaun," dehan Sra. Ana Paula Marçal, Diretora Ezekutiva JSMP.

Antes ne'e, iha fulan Juñu 2024, ofisiál justisa Ministériu Públiku nian partisipa mós formasaun kona-ba kazu sira VBJ tuir manúal investigasaun ba ofensa sira VBJ ba Ministériu Públiku ne'ebé lansa iha 31 Maiu 2024. Manúal ne'e nu'udar serbisu hamutuk entre Prokuradoria Jerál Repúblika (PJR) no Asian Development Bank (ADB) ho apoiu hosi grupu tékniku sira mak hanesan hosi PJR rasik, VPU-PNTL, ALFeLa, JSMP, Pradet, Fokupers, no SEII (agora SEI).

JSMP espera katak depoisde filafali husi feriadu ne'e, autór tribunál sira iha espíritu foun hodi kontinua hala'o sira nia serbisu atu garantia justisa ne'ebé justu ba iha parte sira ne'ebé buka justisa.

Atu hetan informasaun kompletu, favor kontaktu:

Ana Paula Marcal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl